



18. marts 2014

UPA 2014/73

Inatsisartut Suleriaasianni § 36 naapertorlugu apeqquteqaat aallaavigalugu oqallisissiaq imaattoq matumuuna saqqummiuppara:

**Qanoq iliorluni akileraarutinut A-nut ilanngaatip (sulinermit akileraarut) ukiuni tulliuuttuni qaffatsaaliorneqarnissaa pillugu apeqquteqaat allaavigalugu oqallinnissamik siunnersuut**  
(Inatsisartunut ilaasortaq Andreas Uldum, Demokraatit)

### **Tungavilersuut**

Demokraatini upperaarput pitsaanerpaasoq aningaasat innuttaasut kaasarfiiniippata. Akueraarput inuiaqatigiinnut pilersueqataasariaqaratta akileraarutit aqqutigalugit, kisianni akiliisarneq taanna sapinngissamik appasinnerpaaffianiitinniarsarisariaqarpoq.

Aamma isumaqarpugut sapinngissamik appasinnerpaamik akileraarutinut procenteqartitsinerup sulinermit pilerinarnerulersitsisartoq, aamma ilinniartut naammassereerunik sulilernissaminut qilanaarnerusarnissaannut aqutaasussaavoq.

Akleraarnermit Tunguinermit Isumalioqatigiisitap aamma innersuussutiginiuuuaa, isertitanut akileraarut ullumimut naleqqiullugu appartinneqartariaqartoq.

Naalackersuisut siuliisa tamanna paasilluarpaat taamaattumik nuna tamakkerlugu akileraarut ulloq 1. januar 2013 aallarnerfigalugu appartinneqarpoq. Tamanna siumut isigaluni aalajangiineruvoq kusanartoq.

Ajoraluartumik malunnangilaq sulinermit akileraarut appartinniarlugu maannakkut naalackersuisuusut akissanik ujaasinerat. Paarlattuanik allaanngilaq killormut pisoqalersoq. Naalackersuisoqataasup Atassutip 2013-mi ukiakkut Aningaasanut Inatsisip oqallisineqarneranut atatillugu nalunaarutigaa partip isumaa naapertorlugu sulinermit akileraarut qaffattariaqartoq. Tamanna innuttaasunut toqqissisimananngilaq, taakumi ilisimasariaqarpaat nammineq atugassatik qanoq annertutigissanersut.

Taamaattumik Demokraatini isumaqarpugut torrallaanerussagaluartoq Inatsisartut ataatsimoorluta innuttaasunut nalunaarutigisinnaagaluarutsigu, akileraarutit procentia ukiuni tulliuuttuni tallimani qaffanneqarnavianngitsoq aamma ajornanngippat ungasinnerusoq ilanngullugu.

Akerleriiffiusinnaagunartumik Demokraatini isumaqarpugut, neriuutitsitut akileraarutit qaffannginnissaa aalajangiunneqassappat aamma tamanna kommuninut atuutissasoq. Innuttaasut aningaasaqarnikkut toqqissisimanissaat pillugu iluaqutaanngilaq, nuna tamakkerlugu akileraarut uninngatinneqarpat paarlattuanillu kommunimut akileraarut qaffanneqarluni.



Taamaattumik aalajangerneq aamma kommuninut atuuttariaqarpoq. Tamannalu qularnaarumallugu Demokraatini isumaqarpugut pisariaqassasoq periutsimik eqqussissasugut oqarluta kommunit arlaata akileraarut qaffassappagu taava kommunip qaffaanerata nalingi kommuninut tapiissutinit peerneqartassapput koruunit ataasiakkaarlugit. Taamaalioruttga qularnaassavarput kommunimut akileraarummik qaffaanissap kommuninut pilerinarunnaarnissaa.

Demokraatini akileraarummik unitsitsinerup iluaqtissartai arlallit takusinnaavagut. Annermik innuttaasut paasissavaat sulinnermut akileraarutip qaffanneratigut aningaasaatik ilanngartorneqarunnaassasut kiisalu aamma Namminersorlutik Oqartussat kommunillu akileraarut qaffaannaqinagu aaqqiissutissanik nutaanik eqqarsarnerulissapput, pisortat missingersuutaat oqimaaqatigiisinneqarnialeraangata.

Qilanaarpugut oqallinnermut Naalakkersuisut Inatsisartunilu partiit allat ilanngussassaannut.